

# यूहन्ना क तीसरी पत्र

मई बुजुर्ग कइँती सः पिआरे बन्धु, गयुस क नाउँ जेसे मई सत्य में सहभागी क रूप में पिरेम रखत हउँ।

2मोर पिआरे बन्धु, मई पराथना करत अहउँ कि तू जइसेन आध्यात्मिक रूप स उन्नति करत अहा, वइसेन तू सब बातन में उन्नति करत रहा अउर स्वस्थ रहा। 3जब कछू ईसाइ भाई आइके मोका तोहरी सच्चाई में बिसवास क बावत बताएन तउ मई बहुत खुस भएउँ। उ पचे मोका बताएन कि तू पचे कइसे सच्चाई क रास्ता प चलत अहा। 4मोरे बरे एहसे बढ़कर अउर आनन्द की बात नाहीं बाटइ कि इ सुनउँ कि मोर बचवन सच्चाई क रास्ता प चलत अहउँ।

5मोरा पियारे बन्धु, तू मोरे भाइयन बरे जउन करत रहे अहा, ओका बिसवासयोग्यता स पूरा करत अहा अउर विसेसकर जब उ पचे परदेसी अहउँ। 6मुला जउन पिरेम तू ओनके ऊपर दरसाए अहा, ओकरी साच्छी उ पचे कलीसिया क सामने दिहेन। ओनके यात्रा जारी रखइ बरे ओनके वइसेन सहायता करत रहा, जइसेन परमेस्सर बताए अहइ। 7मसीह क सेवा बरे उ पचे यात्रा प निकल पड़ा अहउँ अउर उ पचे अबिसवासी लोगन स कउनउ मदद नाहीं लिए अहउँ। 8इही बरे हम पचे क अइसे मनइयन क सहायता करइ चाही, जइसेन कि हमहूँ सच्चाई बरे सहकर्मि होइ सकी।

9एक तु चिट्ठी मई कलीसिया क लिखे रहेउँ मुला दियुत्रिफेस जउन ओनकर प्रमुख बनइ क लालसा रखत ह।

उ मोरे सबक बताई बातन क न मानी। 10इहइ कारण अहइ यदि मई आवउँ तउ ओकर ओन करमन कि जउन उ करत ह, याद दियाउब। वह अनुचित रूप स मोरे खिलाफ बुरी बुरी बात कहिके दोख लगावत ह; अउर इतने एँतने स ही उ संतुस्ट नाहीं अहइ, उ न तउ खुद भाइयन क स्वागत करत ह अउर जउन स्वागत करइ चाहत ह ओका मना करत ह अउर कलीसिया स निकार देत हय।

11पिआरे बन्धु, बुरे उदाहरण क नाहीं वसन भलाई क अनुकरण करा। जउन मनई भलाई करत ह, उ परमेस्सर क अहइ! उ जउन बुराई करत ह उ परमेस्सर क नाहीं देखेस।

12दिमेत्रियुस क बावत सब अच्छी बात कहत अहउँ। हिआँ तक कि खुदइ सच्चाई ओकरे बरे में कहत ह। हमहूँ ओनके बावत अच्छी बात कहित ह। अउर तू जानत अहा कि जउन हम कहित अही इ सच बाटइ।

13तोहका सबन क लिखइ क वास्ते मोरे पास बहुत बातन अहउँ, मुला मई कलम अउर सियाही स ओका सब लिखइ नाहीं चाहित।

14मुला मोका तउ इ आसा अहइ कि मई जल्दी तोहसे मिलबइ। तउ हम आपुस में बात करब।

15सान्ति तोहरे साथे रहइ। तोहरे सब दोस्तन हिआँ तोहका सबन क नमस्कार कहत अहउँ। उहाँ हर मित्र क नाउँ लइके नमस्कार कह्या।